

lors qu'il veut quelque chose, il dit, sois, & elle est, loüé soit celuy auquel appartient toute chose, & deuant lequel vous retournerez tous ( pour estre iugez. )

---

*LE CHAPITRE DES ORDRES,  
contenant quatre-vingts versets,  
escriit à la Meque.*

*Voy kitab  
et tenir.*

**A**V nom de Dieu clement & misericordieux. Je iure par les ordres des Anges qui adorent Dieu & attendent ses commandemens, par ceux qui empeschent les hommes d'obeyr au Diable, & par ceux qui lisent & meditent l'Alcoran, que vostre Dieu est vn seul Dieu Seigneur des Cieux de la Terre, & de tout ce qui est entr'eux, il est Seigneur du Ponant & du Leuant. Nous auons orné le Ciel & la Terre, des planettes, & les auons mises à couuert de la malice des Diabes, ils ne peuuent pas entendre ce qu'on dit dans le firmament, ils en sont chassez honteusement de tous costez, & seront eternellement tourmentez, s'ils entendent dire quelque chose ils l'escoutent auidement, & s'ensuiuent promptement, mais la planette lumineuse les suit (& esclaire leur malice.) Les impies ont demandé, si nous auons créé quelque chose plus illustre qu'eux; Certainement nous les auons tous créés de la bouë de la terre. Tu t'estonne

de leurs blasphemes, ils se moquent de ton estonnement, & ne se conuertiront iamais; quand ils verront des miracles ils s'en moqueront, & diront que ce n'est que magie euidente de croire qu'ils mourront & qu'apres estre terre, os & poussiere, ils ressusciteront avec leurs peres & leurs predecesseurs: Dis leur, qu'ils ressusciteront, & qu'ils sont deuoyez du droit chemin, que le monde ne sera plus exterminé qu'une seule fois, & qu'ils verront ce qui leur arriuera au iour du Iugement, ils diront ce iour qu'ils sont malheureux, & les Anges leur diront, voicy le iour du Iugement, voicy le iour que les bons seront separez des meschans, voicy le iour auquel vous n'avez pas voulu croire: On dira aux Anges, assemblez-les, assemblez leurs femmes & leurs Idoles, mettez-les au chemin de l'Enfer, & les arrestez pour rendre compte de leurs deportemens, & pourquoy leurs Idoles ne les secourrent pas. Certainement ils desireront estre au nombre de ceux qui ont obey aux commandemens de Dieu, ils se querelleront entr'eux, & diront, c'est vous qui nous avez deuoyez du droit chemin par vos sermens, vous iuriez que vous suiuiiez la loy de Dieu, & que vous obseruiez ses commandemens: au contraire respondront-ils, nous n'auons point eu de pouuoir sur vous, vous estiez vous-mesmes dans vn erreur manifeste, la parole de Dieu s'accomplira contre nous, & ressentirons par compaignie les tourmens de l'Enfer, si nous vous auons deuoyés, nous estions deuoyez comme vous, & serons auourd'huy

compagnons dans le supplice; Ce iour les impies seront ainsi affligez; Ils s'enorgueillissent en terre lors qu'on leur dit qu'il n'y a qu'un seul Dieu, & disent, quitterons-nous nos Dieux pour un Poëte fol & menteur? au contraire, il vous enseigne la verité comme ont fait tous les autres Prophetes qui ont esté deuant luy, vous serez chastiez & traittez selon vos demerites. Ceux qui obïront aux commandemens de Dieu auront un lieu de seureté pour reposer avec toute sorte de fruiçts dans de beaux iardins, arrangez sur des lits delicieux avec des verres remplis d'un breuuage agreable au goust qui ne les enyurera pas; Leurs femmes blanches comme des œufs frais ne ietteront la veüe sur personne que sur eux, ils discourront ensemble, & un d'entr'eux dira, j'auois en terre un compagnon qui me demandoit si ie croiois en la resurreçtion, & si apres auoir esté terre, os & poussiere nous ressusciterions, venez avec moy, allons voir ce qu'il fait; Il le verra dans le fond d'Enfer, & luy dira, Par Dieu peu s'en est manqué que tu ne m'aye seduit, sans la grace de Dieu ie serois damné comme toy, nous ne sommes pas au nombre des morts, nous ne souffrons point de peine; au contraire, nous sommes dans vne tres-grande felicité; ainsi sont recompensez les gens de bien; Qui sont les plus heureux? ou ceux qui sont dans nostre bonheur, ou ceux qui sont auprès de Zacon arbre d'Enfer: Cét arbre sort du fond de l'Enfer, il s'esleue en haut, & ses branches semblent la teste des Diabes,

les damnez mangeront de son fruit, ils boiront d'une eau bouillante, & l'Enfer sera le lieu de leur habitation; Leurs peres estoient infidelles, ils ont fuiuy leurs vestiges & le chemin de ceux qui ont esté deuoyez auparauât eux, nous leur auôs enuoyé des Predicateurs qu'ils n'ont pas voulu escouter, mais cōfiderete qu'elle est la fin des meschans & celle des gens de bien. Nous auons sauué Noé, & fait grace à ceux qui luy ont obey, nous l'auons deliuré avec sa famille d'un grand peril, & auons perpetué sa lignée; il sera loué de tous ceux qui viendront apres luy, parce que nous luy auons donné nostre benediction, ie recompense ainsi les gens de bien, il estoit au nombre de ceux qui obeissoient à mes commandemens, nous l'auons sauué & ceux qui l'ont suiuy, & auons submergé les infidelles. Souuiens - toy d'Abraham, Dieu luy a donné vn cœur exempt d'impieté & de malice, il a dit à son pere & à ses gens, pourquoy adorez vous de faux Dieux au lieu du vray Dieu? pensez vous euiter la punition de vos pechez? alors il eut vne vision au Ciel & dit, ie suis malade de vostre Idolatrie, ils se sont separez de luy avec dessein de se conuertir, & de vider les temples des Idoles de leurs tresors, il a dit aux Idoles, pourquoy ne mangez-vous pas les sacrifices qui sont deuant vous? pourquoy ne me parlez vous pas? & leur a donné vn grand coup de sa main droite; le peuple accourut avec co-

lere, parce qu'il auoit frappé leurs Dieux, il leur dit, adorerez-vous l'ouurage de vos mains ? ne cognoissez-vous pas que c'est Dieu qui vous a créés ? alors ils ont dit entr'eux ; batiffons vn grand bucher, mettons y le feu, & icettons Abraham dedans le brasier, ils ont conspiré contre luy, mais nous les auons rendus honteux & confus, Abraham leur a dit, ie m'en vais vers mon Seigneur, il me conduira au chemin de salut ; Seigneur donne moy vn fils qui soit au nombre des gens de bien, nous luy auons annoncé qu'il auroit vn fils grandement sage. Lors qu'il a esté en l'aage de discretion, il luy a dit, mon fils, i'ay songé cette nuit que ie te sacrifiois, que veux-tu que ie fasse ? il a respondu, mon pere, faites ce qui vous est commandé, vous me trouuerrez plein de patience, lors que son pere la couché par terre, & à mis le cousteau pres de sa gorge, nous luy auons dit, ô Abraham c'est assez, tu as satisfait à ton songe, ie traite ainsi les gens de bien, nous en auons ainsi vŕé pour t'éprouuer, Nous auons racheté son fils par vn beau agneau. Il sera loué de la posterité, & ceux qui viendront apres luy beniront sa memoire ; le recompense ainsi les gens de bien, il estoit au nombre de ceux qui obeissoient à mes commandemens. Nous luy auons annoncé qu'il auroit vn fils nommé Isaac duquel sortiroient plusieurs fidelles & plusieurs infidelles. Certainement nous auons donné nostre gra-

ce à Moïse & à Aaron, nous les auons deliurés avec leur suite d'un peril euident, nous les auons protegés & ont esté au nombre des victorieux ; Nous leur auons donné le liure plein de lumiere, & les auons conduis au droict chemin, ils seront louëz aux siecles à venir, & la posterité benira leur memoire. Je recompense ainsi les gens de bien, ils estoient au nombre de ceux qui obeissoient à mes commandemens; Elias est au nombre de mes Prophetes & de mes Apostres, il dit au peuple. Pourquoi ne craignez vous pas Dieu? pourquoy adorez vous l'Idole Balan & delaissez le Createur du monde? Dieu est vostre Seigneur, & le Seigneur de vos Predecesseurs; ils l'ont dementy, & ont esté condamnez au feu d'Enfer, excepté ceux d'entr'eux qui ont obey à mes commandemens: Nous auons laissé sa memoire heureuse à la posterité, ie recompense ainsi les gens de bien, il estoit au nombre de ceux qui obeissoient à mes commandemens. Loth est au nombre de mes Prophetes & de mes Apostres; Souuiens-toy comme nous l'auons deliuré luy & sa famille d'un peril euident excepté sa femme qui est demeurée entre ceux qui ont esté chastiez, apres l'auoir sauué nous auons exterminé les impies, on a veu le matin les vestiges de la ruine qui leur estoit arriué la nuit precedente, ne comprendrez-vous pas ce miracle? Ionas est au nombre des Prophetes. Souuiens-toy qu'il a fuy dans le na-

wire, & qu'il fut cause du mal des matelots, il fut englouty par la Balene. S'il ne se fut repenty de sa faute il auroit demeuré dans le ventre de ce poisson iusques au iour du Iugement, nous l'auons jetté au riuage grandement foible, nous l'auons couuert de fueilles de Coudre, & l'auons enuoyé prescher plus de cent milles personnes qui se sont conuerties, desquelles nous auons differé le deceds iusques au temps ordonné. Les infidelles ont demandé si ton Seigneur a des filles comme ils ont des fils; Auons nous créé les Anges males & femelles en leur presence? Ils mentent lors qu'ils disent que Dieu a vn enfant, a-t'il voulu auoir des filles plustost que des fils? comme pouuez vous ainsi blasphemer? ne considerez vous pas qu'il est Dieu seul sans enfans? auez vous quelque raison ou autorité de parler de la façon? apportez vos argumens, dites vos raisons si vous estes veritables; Les infidelles ont dit que les Anges estoient de la lignée de Dieu, mais les Anges scauent bien que les infidelles seront damnez à cause de leurs blasphemes. Loué soit Dieu il n'a ny fils ny fille, autres que les gens de bien qui l'adorent, & qui obeissent à ses commandemens; Vous & vos Idoles ne pouuez pas euitter la punition de vos pechez, vous serez condamnez au feu d'Enfer. Il n'y a personne (entre les Anges) qui ne sçache sa place & son ordre dans le Paradis pour louer &

adorer sa diuine Majesté. Si les infidelles disent, nous obseruons la Religion de nos predecesseurs, nous sommes dans le droit chemin; Dis leur, que s'ils ne croient en l'Alcoran ils cognoistront à la fin leur incredulité. Nous auons promis aux fideles & aux Prophetes de les proteger, ils seront protegez & seront victorieux; Esloigne-toy quelque temps des impies, considere comme Dieu les chastie, ils sentiront la punition de leur impieté, se veulent-ils precipiter eux-mesmes dans les tourmens de l'Enfer, assurément ils seront effrayez lors qu'ils les ressentiront, esloigne-toy de leur compagnie, & considere qu'ils ne pourront pas euitter la punition de leurs crimes. Louë ton Seigneur, Seigneur de puissance & de grandeur par-dessus les impies; Salut soit aux Prophetes & louange eternelle au Dieu de l'Vniuers.

